

Script of Morning Gojri News Bulletin 09 December 2024 at 1015Hrs

مارننگ گو جری نیوز بلیٹن مورخہ 09 دسمبر 2024

یوہ آکا شوانی جموں ہے محبوب سلطانی تیں خبر سنو۔

PM Rajisthan

وزیر اعظم نریندر مو دی اج جے پور راجستھان مانہہ رانزینگ راجستھان عالمی سرمایہ کا ری اجلاس غو افتتاح کریں گا۔ اس تقریب مانہہ 5 ہزار توں متا کا روپا ری تے تجا رتی نمائندگان، سفارت کار، سرمایہ کار تے دوجا شرکت کریں گا۔ افتتاح توں بعد اس تقریب مانہہ بکھ بکھ شعبان مانہہ موضوعاتی اجلاس منعقد ویں گا جد کہ پبلک پرواسی راجستھان کنکلیو غو انعقاد کیو جائے گو۔ اس تقریب مانہہ منعقد کرن غو مقصد ریاست مانہہ سرمایہ کاری تے صنعت کاری نانہہ بابدو دینو تے روزگار غا نواں موقعہ پیدا کرنو ہے۔ ریاست مانہہ سرمایہ کاری غا بابدو واسطے ات غا ریاستی وزیر اعلیٰ بجن لال شرما نے حالیہ 9 پالیسیاں نانہہ شروع کیو تھو، جن مانہہ توانائی تے سیاحت وی شامل ہیں۔ اس اجلاس توں پہلاں سرمایہ کاری غا منصوباں واسطے 30 لکھ کروڑ روپیاں غا سمجھوتہ ور وی دستخط کیا گیا ہیں۔ واضع رہے ریاستی سرکار نے اگلا 5 بہراں مانہہ ریاست غی معیشت نانہہ دوگنی کر غے 35 ہزار کروڑ روپیاں غو ہدف رکھیو وہ ہے۔

Rana Tribal

جل شکتی، جنگلات، ماحولیات تے قبائلی امور غا وزیر جاوید احمد رانا نے پچھلے تہارے قبائلی امور محکمہ غا افسران نانہہ ہدایت جاری کرتاں واں کہیو ہے جے قبائلی بہبود غا اقدامات تے منصوباں غا نفاذ اور ان غا نتائج غو تفصیلی جانزولیں، تے جموں کشمیر غا قبائلی علاقان مانہہ بنیا دی سہولیات نانہہ بہتر بنان واسطے عملی منصوبو پیش کریں۔ انہاں نے انہاں گلاں غو اظہار قبائلی محکمہ غا افسران غی اک میٹنگ غی صدارت غے دوران کیو۔ اس میٹنگ مانہہ قبائلی امور محکمہ غا ڈائریکٹر غلام رسول، ڈپٹی ڈائریکٹر تے محکمہ غا دوجا سینئر افسروں موجود تھا۔ جناب جاوید رانا نے کہیو جے حکومت نے قبائلی آبادی غی ترقی اور بہبودی واسطے کئی اقدامات کیا ہیں، تے اس دوران انہاں نے افسران نانہہ ہدایت دی کہ ترقیاتی منصوباں غا نفاذ مانہہ وسائل غا بہترین استعمال نانہہ یقینی بناویں، تانجے ان غا فائدہ ضرورت مند عوام تک پچایو جاسکے۔

LG Education

لیفٹنٹ گورنر منوج سنہا نے پچھلے تہارے جموں یونیورسٹی غا جنرل زوراور سنگھ آڈیٹوریم مانہہ مہاویر بین القوامی اسکول غی 18 ویں سالانہ تقریب غے دوران بھارت نانہہ ترقی یافتہ ملک بنان تے معیشت غا بکھ بکھ شعبان مانہہ پائیدار ترقی ور زور پایو ہے۔ انہاں نے طلباء غی صلاحیت نانہہ اُجاگر کرن تے جموں کشمیر یوٹی غی بنیادی مہارت غا بہتر مستقبل واسطے اساتذہ گزار ور وی زور پایو۔ جناب سنہا نے جدیدیاتی تعلیمی نظام مانہہ مصنوعی ذہانت غا اثر تے اساتذہ تے طالب علمان بشکار رابطہ نانہہ مزید موثر بنان مانہہ اس غا اہم کردار ور وی گل بات کی۔

Weather

جموں کشمیر مانہہ حالیہ برفباری غی وجہ توں اہم رابطہ سڑک جن مانہہ جنوبی کشمیر نانہہ راجو ری، پونچھ اضلع سنگ جوڑن آلی تا ریخی مغل شاہراہ تے کشتواڑ سنتھن سڑک شامل ہیں، نانہہ گڈیاں غی او جائی واسطے بند کر دتو گیو ہے۔ اس ضمن مانہہ سرکار ذرائع نے دسیو ہے جے مسافراں غی حفاظت غے چلتیں مغل سڑک ور گڈیاں نانہہ پونچھ آلی طرفوں بحرم گالہ جد کہ شوپیاں آلی طرفوں بیرپور مانہہ ہی روک دتو گیو ہے۔ اُنکاں محکمہ موسمیات نے 9 دسمبر واسطے جموں غا میدانی تے پہاڑی علاقن مانہہ چڑھ غے نال نال ہلکی برفباری غو امکان ہے جد کہ 17 دسمبر تک عام طور ور موسم خشک رہ گو۔

DM Farmlands

ضلع مجسٹریٹ جموں سچن کمار ویشے نے افسراں نانہہ ہدایت جا ری کرتاں واں کہیو ہے جے سرحدی تار بندی توں پچھے کھیتی باڑی آلی زمیناں غو تفصیلی جائزہ ليو جائے، تانجے ان علاقن مانہہ کساناں نانہہ پیش آن آلی دقتاں نانہہ دور کیو جا سکے۔ انہاں نے انہاں گلاں غو اظہار اک میٹنگ غے دوران کیو۔ جس مانہہ سرحدی حفاظتی دستاں بی ایس ایفغا افسر تے متعلقہ سب ڈویژن مجسٹریٹ وی شامل تھا۔ جناب سچن کمار نے کساناں غی رسائی توں دور زمیناں غو مکمل دستاویزی عمل غی ضرورت ور ور زور پایو۔ اس دوران ایس ڈی ایم نانہہ ہدایت جا ری کرتاں واں کہیو گیو جے زمینی سطح ور میپنگ کر غے کساناں غی اُن زمیناں غی پشان کریں جس نانہہ وے کاشت کا ری واسطے استعمال مانہہ نہیں لیا سکتا۔

Jail Kishtwar

ضلع مجسٹریٹ کشتواڑ راجیش کمار شون نے پچھلے تہاڑے ضلع جیل کشتواڑ غو دورو کر غے تفصیلی معائنو کیو۔ اس دوران انہاں نے حفاظتی انتظامات غے نال نال دیگر چیزاں غو وی معائنو کیو۔ جناب شون نے اُن قیدیاں سنگ گل بات کر غے اُن غی شکایات وی سنیں تے نال نال انہاں نے قیدیاں غی رہن سہن بارے چیزاں غو وی جائزہ ليو۔ انہاں نے قیدیاں نانہہ یقین دہانی کراتاں واں کہیو جے اُن غی شکایات غو ازالو کیو جائے گو۔ جناب راجیش کمار نے جیل نظام غے تحت معیاری طریقہ کار غا نفاذ ور وی زور پایو۔

Army G&B

راجو ری غا دور دراز علاقن مانہہ رہ رہیا لوکاں تے خاص طور ور گجر بکروال قبیلہ توں تعلق رکھن آلاں واسطے پچھلے تہاڑے فوج نے اک طبی گشت غو انعقاد کیو۔ جس غو مقصد اُن لوکاں غی بنیادی ضرورتاں نانہہ پورو کرنو تھو۔ اس ضمن مانہہ بانڈی گالہ مانہہ حالیہ طبی گشت غو انعقاد کیو گیو، جت خاصی تعداد مانہہ گجر بکروال قبیلاں توں تعلق رکھن آلا لوک ہیں۔ اس شروعات غو مقصد اُن طبقہ نانہہ ضروری صحت دیکھ بھال مانہہ مدد فراہم کرنو ہے جہیڑا اس توں اجاں تک محروم ہیں۔

اس غے نال ہی خبراں غو یوہ بلیٹن ختم ہوو۔